



Funtauna: Freepik.com

1 **Tut emblidà! O ti cucu!**

2 *L'odissea d'in paraplievgia cotschen ch'è i a perder en la Viafier*
3 *retica*

4 Jau sun in paraplievgia cotschen. Mia ex-patruna m'ha emblidà en la
5 Viafier retica. Uss spetg jau a Wollishofen en il «Fundsachenverkauf»
6 insatgi che ma cumpra. Jau cust otg francs.

7 Capità èsi ina damaun da trid'aura avant dus mais: Mia patruna va uschiglio adina senza mai
8 a lavurar. Ma quella damaun plovi. Ella ma prenda or da stgaffa e banduna l'abitaziun. I
9 plova ed jau sun cuntent ch'jau dastg puspè ina giada esser en l'aria frestga. Ils daguts da
10 plievgia ruschnan sur mia taila impermeabla e fan sguzias. Quai hai jau gugent. Mia patruna
11 arriva a la staziun da Trun, in vitg en Surselva, ed inscuntra in'enconuschenta. Ellas prendan
12 il tren e baterlan d'in cuntin. A Cuirai fai bell'aura, cura che mia patruna banduna il tren cun
13 sia amia. Ella ma lascha simplamain enavos.

14 **Centrala per chats a Berna**

15 Abandonà e tementà passent jau in entir di en il tren. La saira ma chatta il nettegiunz e ma
16 porta en in magasin, nua ch'igl ha anc autras chaussas isadas. Nus spetgain, enfin ch'ins
17 spedescha nus a Berna en il post central che rimna ils objects ch'ins ha emblidà en ils trens
18 svizzers. Las possessuras ed ils possessurs dals objects pon s'annunziar via internet tar
19 quest post e s'infurmar, sch'ins ans haja chattà. Tgi sa, sche mia patruna scriva era in e-mail
20 e vuless savair novas da mai? I passa in mais, ma ella na s'annunzia betg. Jau sun trumpà.
21 Tgi sa, sch'ella ha gia in auter paraplievgia? In verd, in blau u forsa schizunt in mellen? Tge
22 capita uss cun mai?

23 Las ultimas emnas hai jau passentà sper ina valisch da tgirom. Nus avain fatg in pau
24 amicitia, perquai che nus essan arrivads il medem di en il center a Berna. Uss vegnin nus
25 dentant separads. Jau val pli pauc che 50 francs e stoss perquai bandunar gia suenter in
26 mais il post a Berna. La valisch vala dapli che 50 francs e po restar trais mais.

27 **Ina paletta per di – e dapli**

28 Ensemen cun giaccas da plievgia, fista da viandar, satgs da durmir e valischs vegn jau
29 mantunà sin ina paletta. Tuppamain vegn jau gist stagnà sper ina tastga da sport che spizza.
30 Ma jau hai era in zichel cletg ch'jau sun sisum. Sch'jau fiss giudim en la paletta – curclà da
31 varga in meter material – giess jau forsa en paglia.

32 In camiun transportescha la paletta a Wollishofen sper Turitg en il «Fundsachenverkauf».
33 «Èsi pussaivel che la gliעד emblida tantas chaussas?», sa smirvegla ina da las duas
34 lavureras che s'occupan da la paletta. «Cler. Auters dis survegnin nus schizunt duas u trais
35 palettas – tuttas plain rauba emblidada», di la segunda dunna. Ella para d'esser la scheffa,
36 perquai ch'ella explitgescha co zavrà las chaussas.

37 L'emprim prendan las dunnas a maun la tastga da sport sper mai. Ellas svidan il cuntegn e
38 bittan ils chalzers da ballape che spizzan en il rument. Las chautschas curtas e las soccas
39 vegnan en in satg da resti. Il tricot original da Bayern München mettan ellas d'ina vart per la
40 vendita en l'internet. La tastga da sport vegn sin la pluna cun rauba ch'ins vul vender en la
41 butia «Fundsachenverkauf». Era jau sun in dals objects che sa tschentan sin quella pluna.

42 **In nov vestgì da nozzas**

43 Paucas uras pli tard ma port'ins gia en la butia. Ella è in toc pli gronda ch'il Volg d'ina
44 vischnanca dal Grischun. Igl ha vestgadira, velos e vitrinas plain bratschlets, uras, anels e
45 telefonins. Jau vesess gugent dapi, ma ins ma depona visavi la cassa sper ils auters
46 paraplievgias. Jau na sun para betg il sulet paraplievgia sin quest mund ch'è i a perder.
47 «Quant custas ti?», dumonda il paraplievgia sper mai. «Jau cust otg francs», di jau, pertge
48 ansant hai jau udì, co che las lavureras han discurre da mes pretsch. «Lura na restas ti betg
49 ditg en butia», remartga mes vischin, «ti has ina bella colur e vesas ora sco nov. Jau cust 14
50 francs e sun tut nair. Jau sun qua gia dapi in onn.»

51 Mes vischin è in bagliaffunz. L'emprim sa lamenta el lung e lad ch'el n'haja gia daditg betg pli
52 senti plievgia sin sia taila. Lura cumenza el a raquintar tge ch'el haja observà ils ultims mais.
53 «Sco paraplievgia han ins gea ina prima vista sin la cassa. Ti na crais betg tge chaussas
54 ch'ins po cumprar en questa butia. Novs vestgids da nozzas! Cornas da tschierv! Ed ina
55 giada ha insatgi perfin cumprà in set da flautas d'in fakir da l'India! En las vitrinas vi là hai per
56 cas bischutaria che vala passa 10'000 francs.»

57 **Speranza ploi anc ditg**

58 Jau ma legrel gia d'era pudair observar, tge che la clientella cumpra en il
59 «Fundsachenverkauf». Qua èsi bler pli interessant ch'en la stgaffa stgira a Trun. Ma mes
60 temp en questa butia cuzza mo paucas minutas. Ina dunna ma tschappa gia: «Tge bel
61 paraplievgia cotschen! Mo per otg francs! Quel n'emblid jau segir mai insanua!» La dunna
62 marscha cun mai a la cassa e paja. Ora en il liber ploi. Ils daguts fan sguzias sin mia taila.
63 Speranza ploi anc ditg – betg che mia nova patruna m'emblidia era anc insanua.

(Funtauna: La Quotidiana 12-08-2011, p. 2)